




HADIS 40

OBJEKTIF KURSUS KESELURUHAN:

- a) **Memahami konsep Hadis 40:** Peserta akan memperoleh pemahaman mengenai Hadis 40 termasuk sejarah penyusunan, latar belakang pengarangnya serta peranan Hadis 40 dalam tradisi hadis Islam.
- b) **Mengenalai hadis-hadis utama dalam agama Islam:** Peserta akan mengenali dan mempelajari teks-teks Hadis 40 yang paling terkenal, memahami konteks dan makna setiap hadis serta aplikasinya dalam kehidupan seharian.
- c) **Menghayati pengajaran Hadis 40:** Peserta akan mengkaji dan memahami pengajaran moral, etika dan hukum yang terkandung dalam Hadis 40 serta implikasinya terhadap amalan hidup.
- d) **Mengaplikasikan hadis dalam kehidupan:** Peserta akan mempelajari cara-cara untuk mengaplikasikan pengajaran Hadis 40 dalam kehidupan peribadi, keluarga dan masyarakat serta mengintegrasikan nilai-nilai hadis dalam tindakan sehari-hari.
- e) **Menilai kepentingan Hadis 40 dalam agama Islam:** Peserta akan menilai kepentingan Hadis 40 dalam memahami syariat Islam secara menyeluruh serta peranannya dalam memperkukuh iman dan amalan dalam masyarakat Muslim.

HADIS KE-24: KELUASAN LIMPAH KURNIA ALLAH SWT TERHADAP HAMBA-NYA

عَنْ أَبِي ذَرٍّ رَضِيَ اللَّهُ عَنْهُ، عَنِ النَّبِيِّ صَلَّى اللَّهُ عَلَيْهِ وَسَلَّمَ فِيمَا يَرْوِي عَنْ
رَبِّهِ عَزَّ وَجَلَّ أَنَّهُ قَالَ:

Diriwayatkan daripada Abu Dzar r.a., daripada Nabi SAW yang diriwayatkan
daripada Allah 'Azzawajalla, sesungguhnya Allah SWT berfirman:

يَا عِبَادِي، إِنِّي حَرَمْتُ الظُّلْمَ عَلَى نَفْسِي وَجَعَلْتُهُ بَيْنَكُمْ مُحَرَّمًا، فَلَا تَظَالُمُوا.
يَا عِبَادِي، كُلُّكُمْ ضَالٌّ إِلَّا مَنْ هَدَيْتُهُ، فَاسْتَهْدُونِي، أَهْدِكُمْ. يَا عِبَادِي، كُلُّكُمْ
جَائِعٌ إِلَّا مَنْ أَطْعَمْتُهُ، فَاسْتَطْعِمُونِي، أَطْعِمْكُمْ. يَا عِبَادِي، كُلُّكُمْ عَارٍ إِلَّا مَنْ
كَسَوْتُهُ، فَاسْتَكْسُونِي، أَكْسِكُمْ. يَا عِبَادِي، إِنَّكُمْ تُخْطِئُونَ بِاللَّيْلِ وَالنَّهَارِ وَأَنَا
يَا عِبَادِي، إِنَّكُمْ لَنْ تَبْلُغُوا أَغْفِرَ الذُّنُوبَ جَمِيعًا، فَاسْتَغْفِرُونِي، أَغْفِرْ لَكُمْ.
ضَرِّي، فَتَضُرُّونِي. وَلَنْ تَبْلُغُوا نَفْعِي، فَتَنْفَعُونِي.

“Wahai hamba-Ku, sesungguhnya Aku haramkan kezaliman atas diri-Ku dan Aku
jadikannya perkara yang diharamkan antara kamu, maka janganlah kamu
melakukan kezaliman. Wahai hamba-Ku, kamu semua adalah sesat kecuali
sesiapa yang telah Aku berikan hidayah, maka mohonlah hidayah daripada-Ku,
nescaya Aku berikan hidayah kepadamu. Wahai hamba-Ku, kamu semua adalah
lapar kecuali sesiapa yang telah Aku beri makan, maka mintalah makanan
daripada-Ku, nescaya Aku berikan makanan kepadamu. Wahai hamba-Ku, kamu
semua bertelanjang kecuali sesiapa yang telah Aku berinya pakaian, maka
mintalah pakaian kepada Aku, nescaya Aku berikan pakaian kepada kamu. Wahai
hamba-Ku, sesungguhnya kamu semua melakukan dosa pada waktu malam dan
siang, sedangkan Aku mengampunkan segala dosa, maka mohonlah keampunan
kepada-Ku, nescaya Aku akan mengampunkan. Wahai hamba-Ku, sesungguhnya
kamu tidak mampu menyampaikan kemudaratan kepada Aku sehingga kamu
dapat mendatangkan kemudaratan itu kepada Aku. Kamu juga tidak mampu
menyampaikan manfaat kepada Aku sehingga kamu dapat memberikan manfaat
itu kepada Aku.

يَا عِبَادِي، لَوْ أَنَّ أَوْلَكُمْ وَآخِرَكُمْ وَإِنْسَكُمْ وَجَنَّكُمْ كَانُوا عَلَى اتَّقَى قَلْبِ رَجُلٍ
وَاحِدٍ مِنْكُمْ مَا زَادَ ذَلِكَ فِي مُلْكِي شَيْئًا. يَا عِبَادِي، لَوْ أَنَّ أَوْلَكُمْ وَآخِرَكُمْ
وَإِنْسَكُمْ وَجَنَّكُمْ كَانُوا عَلَى أَفْجَرِ قَلْبِ رَجُلٍ وَاحِدٍ، مَا نَقَصَ ذَلِكَ مِنْ مُلْكِي
شَيْئًا. يَا عِبَادِي، لَوْ أَنَّ أَوْلَكُمْ وَآخِرَكُمْ وَإِنْسَكُمْ وَجَنَّكُمْ قَامُوا فِي صَعِيدٍ وَاحِدٍ
فَسَأَلُونِي فَأَعْطَيْتُ كُلَّ إِنْسَانٍ مِنْهُمْ مَسْأَلَتَهُ، مَا نَقَصَ ذَلِكَ مِمَّا عِنْدِي إِلَّا كَمَا
يَنْقُصُ الْمَخِيطُ إِذَا دَخَلَ الْبَحْرَ. يَا عِبَادِي، إِنَّمَا هِيَ أَعْمَالُكُمْ أُخْصِيهَا لَكُمْ ثُمَّ
أُوَفِّيكُمْ بِهَا. فَمَنْ وَجَدَ خَيْرًا، فَلْيَحْمَدِ اللَّهَ. وَمَنْ وَجَدَ غَيْرَ ذَلِكَ، فَلَا يَلُومَنَّ
إِلَّا نَفْسَهُ.

Wahai hamba-Ku, sekiranya orang-orang yang terdahulu dan terkemudian daripada kamu, daripada jenis manusia dan jin memiliki hati yang bertakwa kepada Allah seperti hati orang yang paling bertakwa daripada kalangan kamu, nescaya yang demikian itu tidak menambahkan apa-apa pun pada kerajaan-Ku. Wahai hamba-Ku, sekiranya orang-orang terdahulu dan yang terkemudian daripada kamu, daripada jenis manusia dan jin, mempunyai hati yang jahat umpama hati yang paling jahat daripada kalangan kamu, nescaya yang demikian itu tidak pula mengurangkan suatu daripada kerajaan-Ku. Wahai hamba-Ku, sekiranya orang-orang terdahulu dan yang terkemudian daripada kamu, daripada jenis manusia dan jin, berdiri di atas suatu tanah lapang, lalu masing-masing meminta kepada-Ku dan Aku beri setiap seorang itu akan permintaannya, sesungguhnya, ia tidak mengurangkan daripada apa yang ada di sisi-Ku umpama sebatang jarum yang dimasukkan ke dalam air laut. Wahai hamba-Ku, sesungguhnya segala amalan kamu akan Aku hitungkan bagi kamu, kemudian Aku sempurnakannya kepada kamu. Sesiapa yang mendapat kebaikan, maka hendaklah dia memuji Allah SWT. Sesiapa yang mendapat selain itu (keburukan), maka janganlah dia mencela (apa-apa) kecuali dirinya sendiri.”

رَوَاهُ مُسْلِمٌ.

Hadis ini diriwayatkan oleh Muslim.

Antara pelajaran dan pelaksanaan inti pati hadis dalam kehidupan yang boleh diambil ialah:

1. Allah SWT memulakan dengan “Wahai hamba-Ku” sebagai panggilan untuk semua hamba-Nya dan menandakan betapa kasih dan prihatinnya Pencipta kepada makhluk-Nya.
2. Hadis ini dengan tegas menunjukkan bahawa haram melakukan kezaliman dalam apa-apa bentuk sekalipun. Allah SWT telah mengharamkan kezaliman ke atas diri-Nya kemudian Dia mengharamkan bagi setiap manusia, maka alangkah besarnya kezaliman orang yang melampaui arahan Allah SWT ini.
3. Allah SWT memberi peringatan kepada manusia bahawa segala apa yang dikecapiya berbentuk petunjuk, makanan, pakaian dan sebagainya adalah belas kasihan daripada Allah SWT, maka tidak seharusnya seseorang itu berasa bangga dan bongkak dengan nikmat yang diperolehnya.
4. Sesungguhnya manusia berhajat kepada Allah SWT dalam segala urusan dunia. Antaranya termasuklah menghilangkan kelaparan, kehausan dan mendapatkan pakaian. Demikian jugalah manusia berhajat kepada Allah SWT dalam urusan akhirat. Antaranya termasuklah bagi memperoleh hidayah dan keampunan dosa-dosa. Sehubungan itu, hampirkanlah diri kepada Allah SWT.
5. Tidak mungkin hamba-hamba-Nya boleh memudaratkan dan memberi manfaat kepada Allah SWT kerana Dialah Tuhan Yang Maha Berkuasa sedangkan hamba-hamba-Nya amat berhajat kepada-Nya. Permohonan hamba-hamba-Nya kepada-Nya sebanyak mana sekalipun Allah SWT boleh mengurniakkannya dan tidak luak sedikit pun kekuasaan-Nya.

SENARAI RUJUKAN PENTING

1. Al-Arba'un al-Nawawiyyah cetakan Dar al-Minhaj.
2. Al-Kafi dan Tatmim al-Kafi: Syarah Hadis 40: Dr. Zulkifli Mohamad al-Bakri.
3. Syarah Hadis 40 Al-Nawawiyyah: Zulhimi Mohamed Nor, Mohd Yusuf Ismail, Amiruddin Mohd Sobali dan Ahmad Sanusi Azmi.
4. Syarah Hadis 40 Imam Ibnu al-Aththar: Terjemahan dan Huraian Dr. Mohd Solleh bin Ab. Razak.
5. 40 Hadis Imam Nawawi: Sebuah Huraian untuk Dunia Semasa: Ali Jum'ah: Terjemahan Lajnah Penterjemahan APT.
6. Modul Penghayatan Hadis 40 Imam Nawawi: Kementerian Pendidikan Malaysia.
7. Al-Wafi fi Syarh al-Arba'in Al-Nawawiyyah: Dr. Mustafa al-Bugha.
8. Jami' al-'Ulum wa al-Hikam: Ibn Rajab al-Hanbali.